

左恪靖侯奏稿續編

恪靖奏稿續編卷二十四目錄

北路官軍連獲大捷摺

進剿北路逆回連獲大捷摺

馬德順陣亡請卹片

請俟捐務辦有成效分別獎叙片

北路官軍連獲大捷摺

奏爲北路官軍連獲大捷恭摺馳報仰祈

聖鑒事竊臣於八月二十九日馳報北路官軍由花馬池進剿連獲大勝時據劉松山八月初八日一稟聲叙厥後雖疊據固原鎮原各屬降回及劉松山留駐花馬池之提督黃萬友等探報劉松山迭獲奇捷陝甘逆回震懼情形然未據劉松山續報未敢入

告也頃劉松山續報八月初六夜下橋營次訶靈州城甘回頭目王洪馬愛被馬化隆喊令襲踞郭家橋陝回

遺巢妄冀斷我後路劉松山令諸軍派隊潛起擊之賊見官軍至伏巢開鎗劉松山知其怯也飭步軍蛇行從礮子密處猛攻馬軍整隊伺巢破衝殺比官軍近薄賊巢巢中賊譁噪益甚官軍一鼓齊登賊巢火起馬隊兩旁抄出立將竄出各匪圍殺斃賊四百有奇生擒五十二名奪獲戰馬一百五十餘匹其焚斃巢內者約一二百名正躡追問忽下橋老營飛報吳忠堡角聲齊作賊將出隊劉松山令馬隊掣轉自率步隊繼之甫抵下橋見營前二里許步賊如林馬賊排列兩頭氣殊驕甚劉

松山令各營小憩傳餐午刻中軍鼓聲起道員劉錕棠  
偕提督尹興茂張振萃喻執益等各率所部由左路進  
提督蕭章開偕曾德喜李雲貴等由右路進劉松山率  
提督陶定昇易致中易德麟李就山李樹棠由中路進  
留提督何作霖譚援萃周國勝軍功董福祥各率所部  
居後備策應馬隊營提督余虎恩潘運璋陳宗蕃列左  
路之左提督彭緒斫譚上連列左路之右均如牆而進  
賊亦分數路迎戰而騎賊猛從兩旁衝出勢如潮湧劉  
松山令董福祥率兩營附左路馬隊衝殺周國勝率一

旗附右路馬隊衝殺正酣賊聞步賊之悍者冒死衝突騎賊半下馬挺矛對刺官軍愈戰愈奮賊不能支左路賊勢先卻劉松山飭何作霖率所部陷陣各路號鼓齊催賊遂大潰追殺四里許忽吳忠堡北有賊馬步千餘突出似圖截官軍之後劉松山令譚拔萃周國勝橫截而出擊之斃賊多名賊仍從吳忠堡北敗去譚拔萃等躡追至吳忠堡西二里許與正路各營復合隊追剿賊賊悉向金積堡遁去計是日兩戰其斃悍賊數百名生擒四十三名奪獲戰馬百數十匹旗幟鎗械以千計官

軍弁丁陣亡者十五名受傷者七十三名管帶馬隊營官提督余虎恩左膀賊矛戳透猶力戰如故訊據生擒逆回供稱是役各寨堡精壯之賊及陝西余彥龍等均來接仗仍爲官軍擊敗此八月初七日兩戰獲勝之情形也初八日賊瞰官軍正修秦渠堤堰已刻仍出隊索戰馬步橫排十餘里劉松山調修隄各營歸隊擊之追過吳回堡二里擒斬二百餘名奪戰馬七十餘匹賊亦不如先日之戀戰也初九夜金積堡逃出漢民供四百戶一帶地方陝回頭目馬正和等股已到金積堡議來

撲營初十日黎明吳忠堡西各寨堡處處角聲競起金積堡一帶馬步大股亦蜂擁而至劉松山飭各軍靜以待之午初始分五路出擊令先堵步賊俟騎賊抄出陣前則以步隊附馬隊猛擊視賊馬步混雜則各路急撲之少頃步賊直偪陣前搦戰經官軍鎗礮擊退旋卻旋前刀矛相接騎賊從兩旁衝來官軍馬步橫出截之賊不能支紛紛敗退官軍五路縱擊乘勢壓追八里許始行收隊計斃賊六七百名生擒六十四名獲戰馬二百餘匹軍械無算馬隊營官提督譚上連左腿受鎗傷子



未出員弁勇丁之陣亡者二十三名受傷哨長七員弁  
丁九十八名蓋亦血戰矣十一日官軍壓吳忠堡而陳  
賊不復出馬隊擒活賊訊之據稱昨日之戰賊中因帶  
傷陣亡者甚多怨陝回不力不肯發糧陝回現於金積  
堡街市掠食堡中亦不能禁也十二日吳忠各堡賊出  
隊依堡而陳金積堡賊亦絡繹出隊列吳忠堡以南劉  
松山見步賊多而騎賊少心異之登高瞭望乃知騎賊  
已盡由吳忠堡北繞至下橋西三里許隱藏樹林及破  
堡中似圖於官軍出隊後襲取營壘者劉松山飭各營

分兩路專擊吳忠堡南之步賊自率五旗步隊四營馬隊分擊樹林破堡中之馬賊飭董福祥兩營列隊爲策應之兵鼓聲起各路奮威衝殺步賊先奔依吳忠堡者收入堡內由金積堡來者向金積堡去劉松山指攻之騎賊旋亦潰退惟左路騎賊數圍立馬未動各營縱馬挺矛衝入賊中步隊繼之縱橫抉盪斃賊甚多大隊分途掩殺約七里許兩路始會合收隊賊均向金積堡一面敗逸計是役擒斬悍回四百餘名獲賊馬百餘匹官軍陣亡四名受傷十七名此八月初八日至十二日四

獲勝仗之情形也劉松山以陝甘逆回雖屢經剿敗而  
人數日增官軍更番出隊不能不留隊守護營壘遇有  
須分支之處隊伍仍形單薄遂飭各營暇時堅修寨堡  
頓放輜重以便多派隊伍迅起戎機十三十四十五等  
日賊伏未動各營併力修築堡塞竣工十五夜詢知陝  
回馬正和等股累經剿敗後未入甘回堡寨散處吳忠  
堡以西各村莊夜半月明如晝劉松山令各營傳餐四  
鼓緣北面和稻田墜燬繞向西南前進萬眾靜悄無聲比  
遁賊巢賊始驚覺急傍村莊列隊易德麟蕭章開劉錦

業乘賊措手不及各督所部奮威衝殺賊見官軍四面圍逼益恟懼不知所爲官軍分途猛撲立破賊巢十餘處賊賊向吳忠堡各寨以南易德麟等緊躡之追至各寨牆邊步賊赴壕遁避馬賊擁擠不前維時甘回各堡均吹角出寨圍擊官軍之勢剴松山令譚拔萃周國勝陶定昇易致中何作霖橫出擊之賊勢不支仍敗回各堡官軍乘勝縱擊擒斬不少天明仍收隊回營是戰獲悍回約四五百名生擒一百二十四名奪戰馬二百數十匹鎗械千餘件官軍陣亡者五名受傷者二十一名

十六十七兩日賊不復出官軍仍加修堡寨十七夜擒獲賊探訊稱陝回馬生彥白彥虎郭阿洪等又各率所部由黑城子半箇城到金積堡劉松山登高望之見西南吳忠堡至金積堡一帶火光騰灼數十里知陝回大至賊探所供不妄料賊陣必寬計分布擊之黎明營之西南正西賊旗林立吳忠各堡亦皆出隊辰刻賊分由吳忠堡南北兩路撲近營壘結隊六七重橫列十餘里已正騎賊直逼營前劉松山督陶定昇易致中何作霖出左路飭易德麟李就山李樹棠出右路譚拔萃

爲策應之兵擊南面之賊飭劉錦棠同尹興茂張拔萃  
喻執益出左路蕭章開曾德喜王秀棟李雲貴出右路  
董福祥爲策應之兵擊北面之賊飭余虎恩陳宗蕃等  
率所部馬隊擊南面騎賊以周國勝步隊附之潘運璋  
彭緒炳等率所部馬隊擊北面騎賊以董福祥中營步  
隊附之賊見官軍大隊成列而出騎賊卽退居步賊兩  
旁相依而陳比官軍進至里許賊騎仍從兩面抄來步  
賊向前突陣勢頗兇悍劉松山先擊南面之賊鎗礮止  
刀矛接鏖戰時許賊漸不支易德麟乘勢大呼陷陣各

營齊進銳不可當南面賊先潰北面之賊經蕭章開劉錦棠各督隊悉銳衝殺亦卽潰奔馬賊見步賊已散無心戀戰官軍乘勝追殺直至吳忠堡西兩面敗賊併聚一路地狹人多敗走難速官軍合隊薄之賊中器械馬匹拋棄無算計是戰斃賊近千名生擒百三十二名獲戰馬三百餘匹營官提督陶定昇右膺中鎗子傷王秀棣右乳中鎗子傷子均未出其餘弁丁受傷者六十八名陣亡者十七名十九日金積堡賊繞出刈稻約數千人劉松山按隊不動意俟其放膽來多則擊之是夜五

鼓令馬步各營分伏南北路樹林中伺之天明賊果於吳忠堡北至余家湖一帶排列騎先步後連亘十餘里老者弱者牽馬騾絡繹下田割稻迨微見官軍隊伍步賊即止不前騎賊仍分數路前來劉松山飛飭伏軍緩動待東北各營將賊擊動伏軍乃分路截之分布甫定賊已深入伏中官軍號鼓齊發騎賊驚惶勒馬不前各營乘勢縱擊賊大潰易德麟劉錦棠見東北賊陣稍卻急起截之殿後馬賊飛駛而遁步賊約五六百擠入稻水田中官軍圍殺殆盡大隊壓追五里許沿途斃賊八



九百名擒獲割稻老弱三百餘名縱之令歸是役馬隊  
營官提督余虎恩左肩復受鎗子傷甚重弁丁陣亡者  
六名受傷二十七名二十一日擒獲金積堡小回目馮  
沅發據供馬化澂因調崔三未到又調靈州王洪周斌  
兩股由黃河遊來嗾河東河西各寨精壯回民多帶拍  
鎗小鎗集金積堡並嗾陝回馬正和將甯安四百戶一  
帶護守家眷各壯丁悉來決戰二十五日天明逆回自  
金積堡數路齊出步賊排列吳忠堡左右各村壕外騎  
賊附其兩旁吳忠堡各賊亦列隊壕外內以待劉松山

按隊勿動候至巳初飭易德麟李如山李樹棠尹興茂  
張拔萃分兩路由吳忠堡之左進劉松山率席大成易  
致中何作霖蕭章開會德喜分兩路由吳忠堡之右進  
留譚拔萃周國勝及董福祥中左兩營備策應飭馬隊  
管官潘運璋等爲左翼喻執益率所部步隊附之陳宗  
蕃彭緒忻等爲右翼李雲貴率所部步隊附之分布甫  
定騎賊漸次向前衝突各路官軍號鼓並發火器齊施  
騎賊不支仍敗退步賊之旁官軍奮威衝殺鎗礮止刀  
矛接酣戰雨時斃賊無算中有紅衣青馬逆首中礮落

馬賊搶負而逃餘賊大亂官軍乘勝蹙之賊中人馬擁擠紛紛墮入壕坎官軍四面圍逼見賊卽斫復猛追八里許沿途屍骸枕藉吳忠堡之賊縮退堡中漏逸之賊均向金積堡逃竄計其斃馬步悍賊千數百名生擒百五十餘名獲戰馬四百餘匹鎗械九百餘件據活賊供逆首馬正和右乳帶礮子傷墮馬餘賊搶護而逃面色已變卽所見紅衣騎青馬者也馬正和在陝回頭目中兇悍最著此賊伏誅陝甘各回自更喪膽是役提督曾德喜左腿被拾鎗子洞穿易執中左乳旁受矛傷甚重

哨官受傷者十三員弁丁受刀矛礮子傷者七十一名  
又塼石傷者百零四名陣亡者三十七名二十六日金  
積堡回又出割稻劉松山見其人數不多未出隊二十  
七日馬隊擒獲賊探訊知陝回崔三李經舉等股悉到  
金積堡二十八日黎明西東一帶塵氛大起吳忠各堡  
亦出隊南至水邊北至余家湖排列十餘里遙見羣賊  
多帶鋤鏟並用矛量地劉松山揣賊屢經痛剿或圍扶  
濠以阻官軍親往覘之令各營准備出隊比回營卽飭  
易德麟督李就山李樹棠等進左路蕭章開督前旂左

併及李雲貴等進右路自率席大成何作霖譚拔萃周國勝進中路飭劉錦棠等居後策應三路而以馬隊列步隊兩旁別以步隊附馬隊之後比進至三里許騎賊已從左右飛奔而來步賊亦冒死來撲官軍馬步整隊禦之刀矛鎗炮並進賊屢前屢卻轟斃殺斃無算步賊甫頓而騎賊仍與我馬隊拚死相持劉錦棠催譚拔萃飛赴左路喻執益飛赴右路助戰騎賊始敗各路乘勢猛撲緊壓緊追賊紛向吳忠堡左右兩路敗走追過吳忠堡西賊復回拒又經官軍擊敗併向金積堡竄逸追

殺五里許至板橋敗賊人馬擁擠墜落溝壑者不計其數官軍收隊少頃金積堡復出賊一二千似圖接應敗賊者劉松山飭兩路均連環收隊追賊撲近始猛衝之收隊至吳忠堡東半里許敗賊麕聚愈來愈多中營鼓聲起各路返旂猛撲賊復大潰仍追至板橋而還計其斃悍賊一千六七百名生擒一百八十餘名賊中受傷者約倍於斬馘之數獲戰馬五百餘匹鎗械則拾不勝拾矣是役提督易德麟左乳受拍鎗子重傷軍功董福祥頭顱及左肩均受磚石傷軍功張俊右肱腋受鎗子

傷馬隊營官陳宗蕃右腿受矛傷哨官受傷者十八員  
其餘弁丁受刀矛鎗礮者九十二名受磚石傷者一百  
三十七名陣亡員弁勇丁三十五名而殺賊多於諸戰  
此劉松山一軍八月十六日起二十八日止疊次獲勝  
情形也臣維馬化澂所恃以抗官軍者有二金積堡地  
勢居秦漢二渠之間積流分醜舊稱沃壤足以阻水自  
固而困官軍一也回教有新老之分馬化澂本新教回  
民與陝甘老教回民宗旨不同互相水火及與漢民尋  
仇生衅則彼此通同一氣無復新老之分而甘回究不

如陝回之強馬化澄尤思藉以自衛始因陝回窺附代  
爲乞撫市德於陝回繼因陝回反覆無常又思預爲別  
自以免官軍之勦其詭謀益謂陝回勝固可藉以爲重  
陝回敗亦有詞以自解究之陽順陰逆其用心則路人  
所共知二也劉松山自花馬池進靈州於甘回之已撫  
者本已預示區別馬化澄嘆甘回陝回抗拒時初不料  
官軍之鋒不可妄犯思一逞以自雄迨八月初三日郭  
家橋大敗後初四日又遽棄代陝回求撫爲緩兵之謀  
而於劉松山兵至下橋距金積堡三十里地方卻一字



不露替欲掣臣與穆圖善准撫之批以挾制劉松山耳  
臣於馬化澂前稟批示剿撫機宜北路應由劉松山劉  
錦棠察看南路應由雷正綰黃鼎察看者以此幸劉松  
山燭其奸謀一意進剿未及一月疊將甘回陝回痛加  
懲創實殺賊一萬數千之多臣飭雷正綰黃鼎周蘭亭  
簡敬臨馬德順馬步各軍亦於陝回犯及固原時迭與  
掃蕩連獲大捷奸謀更阻馬化澂旋又於九月初三日  
具稟求撫矣臣閱其九月初三日一稟情詞尙爲哀切  
而緘中又附八月初六日一稟則頗以劉松山濫殺激

變爲言猶思藉詞聳聽情形殊爲可惡臣又批飭之仍  
擬察其誠僞以定剿撫貳則討之服則舍之務在攻心  
以規以遠所有馬化澂四次原稟及臣批詞均抄送軍  
機處以備考核至金積堡地勢之險要陝甘官民均能  
言之劉松山所藉以得手者在於靈州速進先據下橋  
後五里之永甯洞得以宣洩河渠之水故能制賊而不  
爲賊所困觀馬化澂現稟求劉松山返駐靈州及請臣  
委員赴靈州受撫其情可見至固厚北路各軍捷狀及  
甘回求撫陝回南竄甯夏已無回蹤一切情形容卽據

實績報此次陝甘回逆同時抗拒官軍賴劉松山速赴  
戎機分別辦理得以潛銷積年隱患於大局實有關係  
該提督忠勇實一時諸將之冠前因失察游匪一案蒙  
恩革職留任可否請

旨開復處分之處出自

天恩其前案內失察之分統營哨各官此次均奮不顧  
身亡傷頗衆可否一併免其查參其案外各員實爲出  
力者可否由臣保獎出自

聖裁至疊次陣亡之記名提督鍾建高提督銜記名總

兵胡玉元記名總兵牛得起推補副將陳士標鍾宣晉  
龍錫玲楊朝有副將銜補用參將萬名高易本集補用  
參將張澤友易光前參將銜補用遊擊李名成楊篤才  
補用遊擊劉疏元黃德祥竇義和補用都司徐育南章  
如山金崇德鍾貴德拔補守備趙祥友王玉順常中華  
陳國恆涂碧勝守備銜千總吳名填蕭其中拔補千總  
劉桂堂拔補把總單洪桂熊王貴滕加全鄧代全楊芝  
蓮等實係血戰捐軀應均請

旨敕部各昭官偕從優議給

卹典以妥忠魂而昭激勸伏乞

皇太后

皇上聖鑒訓示施行謹

奏

同治八年九月二十五日

軍機大臣 字寄同治八年十月初二日奉

上諭左宗棠奏北路官軍疊勝請開復劉松山處分暨陣亡各員并議卹一摺據稱劉松山一軍田花馬池之剿自八月初六日起至二十八日止在吳忠堡等處連獲勝仗殺賊甚多馬化澥現稟求劉松山退駐靈州及

請委員赴靈受撫等語前因定安奏劉松山肆行殺戮  
致回民復叛襲踞靈城各情迭諭該大臣查明具奏現  
在靈州情形究竟何似劉松山有無濫殺激變情事仍  
著懷遵前旨迅速奏聞馬化澂求撫各節原未可盡信  
爲真若此時靈州已失該回目有公然復叛之心皆大  
臣自應督軍進剿破其奸謀若已震懾兵威真心求撫  
前此亦無襲踞靈州之事卽著斟酌情形妥爲辦理毋  
令日起猜疑至甘回窮困情狀尙與陝回不同該大臣  
亦當悉心體察以戢兵端雖不可一意言撫而臨事決

機亦不可涉以成見所請開復劉松山革職留任處分  
及營哨各官免其查參出力員弁請獎之處均著俟  
明靈州情形覆奏後再降諭旨陣亡之提督鍾建高總  
兵胡玉元牛得超副將陳士標鍾宣晉龍錫玲楊朝有  
參將萬名高易本集張澤友易光前遊擊李名成楊篤  
才劉疏元黃德祥賓義和都司徐育南卓如山金崇德  
鍾貴德守備趙祥友王玉順常中華陳國恆涂碧勝干  
總吳名填肅其中劉桂堂把總單洪桂熊玉貴滕加全  
鄧代全楊芝蓮均著交部各照官階從優議卹其固原

北路各軍戰狀及甘回求撫陝回南竄情形著卽詳晰  
查奏以紓屢系本日據穆圖善奏范銘石成器兩軍索  
餉甚亟請飭催撥餉接濟等語著該大臣迅飭袁保恆  
於西征半餉內趕緊勻撥源源解赴甘營不可稍存膜  
視穆圖善又奏稱甯靈回衆仍宜籌撫及飭胡昌會督  
同馬朝清開導回民各節與現在辦法有無窒礙亦著  
該大臣隨時籌辦用靖邊陲原片著抄給閱看將此由  
六百里諭令知之欽此

附穆圖善片



再前因董志原大股陝回竄入甯盛地方

奴才

所部兵

力驟難抽介權派署河州鎮總兵胡昌會前往督同靈

州金積堡回紳馬朝清彈壓開導及據胡昌會稟報駐

紮甯安堡貴字三營被圍多日

奴才

飛飭該統領夏允

升相機移營駐紮中衛爲保守縣城之計各情業經先

後

奏明在案嗣據胡昌會遞次稟呈由中衛起程前赴靈

州金積堡途次前安堡適陝西回目楊文治崔巍馬鎮

和等派隊迎接面懇代稟投誠內有河州回目馬占魁

對衆喧嚷云穆將軍收撫是假往往先撫後剿未可深信竟當糾約陝衆赴河州會合大舉入寇胡昌會當與面爭陳以成敗利害多方曉諭更幸陝目楊文治亦爲幫同開導馬占魁始云既係如此俟果將陝衆收撫安插妥當彼時伊等誓願歸誠等語胡昌會隨即馳赴金積堡查得本地回民安靜如常當與馬朝清飛調陝西各回目馬鎮和崔魏陳林馬壽清閻明泰藍泰治士俊李經舉馬長順禹得彥于恆廉沙學德馬必政白彥虎楊文治馬生彥等先後到齊該頭目均願投試求爲轉

懇收撫該署鎮因無地安插暫令各在現任地方靜俟  
請示再行遷移不准在外滋擾自外生成該署鎮卽於  
七月二十五日由金積堡起身馳赴甯安堡時我軍貴  
字三營被困日久糧水兩缺胡昌會卽諭令馬鎮和等  
遣散其黨幫辦車輛船隻將三營弁勇渡河於八月初  
三四五等日一併移紮中衛防守該縣城池忽接馬朝  
清函開劉提督松山帶領大兵突抵吳忠堡率行搶殺  
馬朝清差人投稟劉提督語言矜躁有不分良莠之意  
難免已降回民猜疑聚眾滋事邀請胡昌會仍回金積

堡商辦等語胡昌會正擬前往又聞陝甘回衆屬集金積堡有與大兵接仗之事尙不知大局如何等情呈請核辦前來奴才查左宗棠派劉松山一軍由北進逼原係迎擊董志原竄賊免致勾結甘回蔓延爲害該署鎮胡昌會所稱各該頭目俱願投誠固難保非勢窮乞降藉緩我師而調陝甘回衆屬聚金積堡與官兵接仗亦係該署鎮得諸傳聞虛實均未可遽信但查吳忠堡距金積堡祇三十里距靈州亦三十里若如馬朝清所致胡昌會信函兵抵吳忠堡率行搶殺實恐激成事端又

成不可收拾之勢伏查靈州回紳馬朝清卽馬化澂本  
係營弁自甯夏郡城失陷被逆回馬北沅逼脅靈州變  
亂其時該紳尙知約束金積堡回民不許出外滋事先  
向雷正綰曹克忠兩營求撫交銀交糧後曹克忠帶兵  
進紮滾泉該紳恐回衆疑懼上稟諫阻未蒙批准曹克  
忠等旋又進紮強家沙窩致陝回拚死抗拒大挫兵威  
而馬朝清仍勸諭本堡回民安靜待撫並設計之馬兆  
元殺斃迨奴才奉

旨督辦軍務該紳復具稟乞誠初次捐修渠工銀八千

兩米一十五萬斤並呈繳器械馬匹多件曾經奴才於同治五年三月具奏並抄錄該紳原稟恭呈

御覽欽奉寄

諭穆圖善奏覆陳馬化澐投誠各摺著准其投誠責令前赴各路開導回民立功自贖等因卽經奴才宣傳

聖諭先令該紳隨同代理靈州知州尹泗將該州善後一切事宜妥速籌辦並查點營庫存儲各項軍械數目亦於是年四月間復奏嗣該紳安輯地方保衛漢民勸導回眾投誠擒斬叛亂陝匪並親往李旺海城等堡收

撫鹽固一帶降回出力奴才於是年九月初八日保奏  
奉

旨馬朝清著賞加副將銜仍責令該弁保衛漢民勸導  
回衆不准始勤終怠欽此等因迨奴才親赴靈州該紳  
馬朝清所部回衆俯伏道左感頌

皇仁馬朝清並倡率報捐翎頂職銜約計二萬兩復自  
願捐助糧米預備駝隻陸續轉運大營奴才查看漢回

安堵商販通行流亡復業地刀一律底定情形又於是  
年九月二十八日詳細陳明繼奉同治七年正月初七

日

上諭玉通奏西甯府屬漢回互鬪北川失陷一摺其新  
降回目馬朝清並著穆圖善催令前往毋稍遲緩等因  
奴才因甯靈一帶安插就撫之回悉資彈壓其責甚重  
難以分身已將未能赴湟緣由覆陳各在案至同治七  
年閏四月該紳會同靈州兵役將著名刁匪馬目哇馬  
晶中馬舉擒獲解送甯夏郡城分別斬首梟示會蒙  
恩賞加提督銜其同時獲犯出力之馬耀邦馬萬選赫  
壯圖馬明起赫忠義均蒙分別



賁給官階虛銜是年六月該紳馬朝清派令穆生花馬  
振海馬忠海又將暗中結盟謀爲不軌之楊生魁馮學  
禮白天鳳等一百餘人殲斃解散餘黨救出被脅良民  
甚多奴才於上年八月據寶奏明亦在案且連年捐糧  
運送每歲不下七千石積成巨款接濟飢軍是馬朝清  
之深明大義矢志靡他證之前事已班班可考令官兵  
行抵吳忠堡如果率行槍殺則金積堡與靈州均唇亡  
齒寒自不免羣生惶惑夫螻蟻尙知貪生人豈不知惜  
命當危急之時鋌而走險勢所必致奴才不敢謂甯堡

已降之回皆良民也但無事之日善者相安惡者自隱  
受其制卽向有匪徒竊發善者不難羣而攻之如馬白  
哇楊天魁等股卒爲馬朝清穆生花等殲除是也若兵  
自外來事起倉猝居民不知其意之所在善者固不免  
驚疑惡者亦必圖一逞以自快且恐不法之徒妄造謠  
言謂官兵此來洗某莊某堡是善者爲惡者煽惑亦將  
逼而爲抗拒官兵之舉彼時各頭目如馬朝清等雖可  
信其立志堅定而教下多人情急變生必致理喻勢禁  
兩爲束手我軍能以大獲全勝一鼓殲除幸也而已上

干天地之和若官軍稍有不利從此回氛四起東路未  
定之鹽固西路已無之肅州皆成變局而河狄兩甯各  
路匪徒更將乘機蠢動烽煙滿地我軍應接不暇究從  
何處下手此實萬不可不審慎於先機者也伏讀屢次  
上諭祇分良莠不分漢回甘省漢民受回匪之害最深  
固無不思拔盡根株方足以消積忿即奴才亦豈不願  
將此股全數殄滅弭隱患於將來但從古用兵無非剿  
撫兼施未聞不留遺種卽近時髮捻各逆一經痛剿之  
後其畏罪歸誠者無不仰邀

聖澤化盜爲民良以殲厥渠魁竹從罔治且萬無誅鋤  
盡淨之理竊意奴才從前帶兵入甘親見甯靈百姓流  
離夫所無業可歸竟致人食人肉而官軍又嗷嗷待哺  
郡城久攻不下若不將計收復既虞士卒因飢譁潰更  
恐熾回匪之兇燄漢民益靡有孑遺是以當該處回族  
震懾兵威俯首聽命之時卽爲因勢利導分別勸懲勒  
令縛獻首惡呈繳器械馬匹准予自新在受害之漢民  
固不免疑奴才偏於主撫而不知寬降回一線之路正  
爲全漢民數百萬之生追後五年三月蘭州省城兵變

河狄陝西回匪乘間環逼於外其時省城糧價每斗值銀三十餘兩餓殍盈途根本之危懸於一線而甯靈降回各安生業並無一人前往蘭州助逆於是漢民相信日深陸續歸籍者難以數計今已數年漢回交相貿易和好如初若降回稍有反側之心漢民卽先有恐惶之象豈能毫無猜嫌至於今日伏思奴才滿洲世僕何德於回何仇於漢況所部兵勇及辦事之人均屬漢民有何區別實因大局攸關天良難昧故有真心向化之回必仰體

朝廷一視同仁之意代爲乞

恩卽明知其投誠不足恃而亦權准收撫者亦無非痛  
漢民火熱水深因兵難遍及不得不暫示羈縻以救殘  
黎性命此等情形俱已早蒙

聖明諒鑒如今日之甯靈若不分別良莠恩威並用實  
恐甘省兵連禍結迄無已時卽將來左宗棠剿而後撫  
亦未必能堅回民之信奴才雖將交卸不敢知而不言  
亦未敢聞而不顧除飛飭胡昌會督同馬朝清仍行妥  
爲開導彈壓本地回衆毋得妄起猜疑並確探北路進

兵實在情形另行奏報外爲此附片密陳伏乞  
聖鑒訓示謹

奏

進剿北路逆回連獲大捷摺

奏爲官軍進剿北路逆回連獲大捷現籌剿辦情形恭摺馳報仰祈

聖鑒事竊

臣

於八月二十九日馳報剿辦中路土匪迅

就肅清現籌會剿北路逆回情形後據報固原回民毋仲元等被陝回白彥虎等所脅挈眷北徙金積堡陝回白彥虎及甘回李正榮等各股復由預望城黑城子竄入固原州揣賊意在阻截官軍北行而以全力抗劉松山也維時固原提督雷正綰駐軍古城川右家溝八月



二十四日陝回白彥虎甘回李正榮穴撲官軍營壘適  
提奏提督周蘭亭自瓦亭馳至會同雷正綰擊敗之賊  
復嗾預望城半箇城李旺堡各處之賊紛來抗拒臣已  
調提督銜前衛州鎮總兵簡敬臨二品頂戴按察使銜  
陝安道黃鼎自中路馳至二十八日簡敬臨周蘭亭黃  
鼎出隊辰刻抵二十里鋪偵賊由平川兩路衝來官軍  
分三路迎擊賊衆趨至氣殊驕甚官軍嚴陣卻之鎗礮  
對施斃悍賊數十名鏖戰逾時雷正綰隊伍由黃毛嶺  
壓下簡敬臨周蘭亭黃鼎麾軍猛進奮威衝殺賊不能

支各營馬步乘勢壓擊斃賊二三百名城內賊復護老弱衝出官軍分途橫截將賊衝爲數段各賊及固原敗賊均向黑城子敗遁各軍躡蹤緊追至固原北三十里頭營地方沿途斬殺無算計其斃賊一千有奇生擒千餘名分別斬釋奪獲騾馬千餘匹刀矛鎗礮數百件此二十八日官軍會剿逆回獲勝肅清固原之情形也訊據賊供劉松山自八月初三日郭家橋大捷後旬內又疊獲大捷馬化隆嗾甯安四百戶同心預望各堡回衆再與劉松山決戰因恐固原各軍並進遣馬萬春等嗾

陝甘回衆力抗南路之師臣當飛催固原名軍乘勝速  
進期與劉松山收夾擊之效雷正綰簡敬臨周蘭亭等  
詞黑城子踞逆因官軍進固原白彥虎李正榮敗後一  
日數驚各回衆紛紛北徙九月初三日四鼓各軍秣馬  
蓐食整隊前進行距黑城子四里許瞭見賊衆蟻聚平  
川騎賊布滿東西兩岸官軍步隊從中路排進馬隊張  
左右翼徐行賊見官軍至正分股上川抵禦馬隊疾馳  
繞出黑城子之後賊衆大亂步隊乘勢薄之賊不及歸  
巢冒死扎窟步軍立破黑城子回堡擒斬多名馬隊躡

至界牌沿途殺斃數百名獲騾馬百餘匹仍收隊回固  
原適三百戶地方良回穆進善報稱白彥虎等被劒後  
糾合禹得彥楊文治由黑城子旁出胡家廖坡大股屯  
踞距固原六十里之三營地方雷正綰簡敬臨周蘭亭  
約黃鼎出隊自率所部於初八日進剿偵賊已到頭營  
地方伏各破堡中步隊遂密結方陣整隊徐行騎兵張  
兩翼前進遇賊卽擊均有擒斬連日賊且堵且退似引  
官軍深入者初十日黎明周蘭亭簡敬臨留兩成隊護  
輜重於楊老莊各率八成隊進剿行未數里該逆大股

風馳雨驟而來簡敬臨飭總兵姚連陞譚正明彭壽山率隊進左路周蘭亭飭總兵趙玉亭劉明泰知州黃立鰲率隊進右路親率所部及廣東高州鎮總兵徐文秀縣丞吳恩榮居中參將桂錫楨領馬隊出左路之左參將李廣珠領馬隊出右路之右分布甫定該逆以大股猛撲中路另股從左右兩路抄來兇悍殊常各營屹立不動俟其漸逼漸進乃以線鎗洋鎗連環轟擊夾以劈山礮賊中人馬應聲而倒勢漸不支周蘭亭簡敬臨麾左右兩路馬隊飛馳陷陣步隊繼之賊衆潰走官軍躡

至三營地方敗寇入堡死拒左右坡堡內伏賊齊起周  
蘭亭簡敬臨飭姚連陞趙玉亭等兩路出隊擊之馬隊  
斜抄賊前各營愈戰愈奮銳不可當該逆越堡而遁堡  
外之賊亦奪路狂奔是處拔峻溝深賊中人馬自相蹂  
籍墮斃無數官軍分途扼截斃賊八百有奇生擒百餘  
名奪獲戰馬百餘匹敗賊向洪溝逸去當據賊供甘回  
馬萬春嗾白彥虎禹得彥楊文治圍與官軍力戰今日  
擊敗之賊卽馬萬春所統也訊畢斬之令彭壽山黃立  
鰲率所部憑堡扼駐以防黑城子何家溝抄襲之賊周

蘭亭簡敬臨仍率各營前進甫行數里後路探騎飛報  
何家溝突出一枝騎賊圍撲彭壽山等營周蘭亭簡敬  
臨丞麾軍回援時該逆正與彭壽山等相持適雷正綰  
亦率所部各營馳至賊駭而奔各軍仍會合追剿將抵  
黑城子瞥見紅衣賊首率騎賊飛奔前來勒敗賊力鬪  
官軍整隊迎之馬隊亦下馬挺矛接戰立斃悍賊數十  
名賊勢稍卻忽紅衣賊首領數百騎飛馬突陣勢甚兇  
悍官軍分隊截之立將賊首戮傷墜馬餘賊亡命搶護  
復經官軍格斃多名賊仍敗退訛據賊首乃陝回僞元

帥楊文治狡悍異常屢以撫誤官軍者也立斬其首以徇又追數里始收隊回營計是役其斃悍賊千餘名獲騎馬近千生擒百數十名此初十日各軍獲勝擒斬逆首情形也逆首楊文治首級解營臣令傳示受害各地方以昭

天討而快人心驗視楊文治所用鐵矛重十七斤其悍可想十一日雷正綰馬德順周蘭亭簡敬臨黃鼎各留一營駐黑城子防海城鹽茶廳預望城來犯之賊率所部馬步各隊進攻李旺堡十二日五鼓各軍齊由八營



地方進發行近李旺堡誦賊正擊脊而逃馬步各賊列  
堡外思抗官軍雷正綰等商令分兵三路齊進馬先步  
後賊望風而潰陣斬數十名乘勢衝殺立將李旺堡賊  
巢攻毀賊向半箇城竄走官軍馬隊猛躡之步隊兩路  
夾擊賊遇溝坎頓旗死抗官軍追之急逆騎輒擁擠不  
前自相路藉死者無數猛追三十餘里至永家莊沿途  
斃賊近千名得逸去者僅數騎耳訊之生擒賊知李旺  
堡賊首李應春縋號野賊老巢尚在李旺堡前五里地  
名穆家潭各軍立派步隊圍之是處堡小而固賊見官

軍至瀘堡總抗官軍以炸彈劈山礮仰攻之肉薄而登  
立將賊巢攻破巢內悍賊數百名無一漏網生擒偽副  
元帥楊輝雲訛知賊首李應春赴預望城求援未回楊  
輝雲本陝回僞元帥李經舉之副也當斬以徇其漢民  
婦女幼孩則縱之是役斃賊千餘名獲騾馬千餘頭生  
擒百數十名此雷正綰周蘭亭簡敬臨各軍攻克李旺  
堡穆家潭情形也自楊文治伏誅後陝甘各回震懼益  
甚而金積堡馬化澂已屢為劉松山剿敗詭謀盡露且  
愧且悚不得不令各堡甘回迅速求撫以掩其勾結之

奸馬化澁新教各回堡以預望城卽禹王城半箇城卽同心堡爲最大諸回日旣受馬化澁指使就官軍求撫陝回心更不安於是陝回禹得彥白彥虎李經舉等之在預望城者潛率各部衆由鹽茶廳西竄約踞甯安四百戶之崔三馬生彥及馬正和部衆金積堡所留之陝回陳林等悉數西趨圖由長流水打拉城出會甯安定一帶南合河州之回暫延喘息黃鼎得各土回密報卽商馬德順收隊黑城子會師追之臣所遣總理營務處四川候補道曾傳理適至黑城子共商一切十四日兩

軍由黑城子冒雪過行六十里抵黃楊坪詢之士回知  
禹得彥等三日午前尙盤踞鹽茶廳一帶追官軍攻克李  
旺堡始移家小輜重於西安堡李經舉白彥虎仍在黃  
家園黃鼎馬德順會商十六日馬隊先行步隊繼之爲  
犁巢掃穴之舉追六十里至鹽茶廳見炊爨尙燃知賊  
去未遠馬德順督馬隊又猛追四十里至西安堡一望  
平川延袤三數十里四面賊帳布滿見官軍馬隊馳至  
老弱婦女號哭紛竄悍賊數千吹角齊出力拒官軍馬  
德順令馬軍分半下馬挺矛衝殺一半縱馬開鎗縱橫

盪決立斃悍賊五六百名賊勢大敗分向黃家園及西山一帶奔竄馬德順及黃鼎呼敦馬隊營官胡應芳黃虎臣整隊追殺見賊卽斫沿途又斃賊千數百名賊中頭目死亡者多不復成列馬德順見前面山岔紛岐急督各營分三路搭剿分統提督張會元向南山一路留陝補用副將崇志率吉林馬隊胡應芳黃虎臣率呼敦馬隊向北山一路自率黃旗及親兵小隊由中路黃家園進復追殺十五六里至劉家井路隘不容方駕兩旁皆深溝馬德順率親兵十餘策馬前行察看地勢忽兩

旁馬步伏賊數百齊出刀矛攢刺山上賊眾拋石雨下  
馬德順身帶刀矛傷七處猶與黃旗哨官副將張顯揚  
各手刃數賊力竭而殞張會元受矛傷三處吉林馬隊  
哨官全德受矛傷五處呼敦馬隊哨官剝治均受刀矛  
傷七處經各營搶獲上馬折回計各營馬隊弁丁力戰  
陣亡者共三十餘名黃鼎隨率步隊馳至督隊勒馬回  
擊飛催步隊分路向前衝殺始將逆賊擊退因路狹不  
能施展收隊還駐黃家園是夜黃鼎與張會元等面商  
飭黃旗小隊及副白旗護送馬德順張顯揚忠骸回固

原州而仍率所部馬步名營會同張會元所部副回旗  
馬隊崇志所部吉林馬隊於十七日由西安堡出乾鹽  
池向打拉城前進行六十里至乾鹽池探報打拉城見  
有大股逆回盤踞炊烟綿亘數十里黃鼎詢之降回知  
是甯安四百戶等處陝西回逆由長流水西竄者是夜  
四鼓馬步各軍急起躡之行近打拉二十里卽見東北  
山梁一帶煙塵滾滾西去知逆賊已由打拉城竄動黃  
鼎飭左營押護輜重緩行飭參將林定遠總兵黃有忠  
參將朱蘭亭率所部步隊副將胡應芳率左營馬隊循

右路山梁進張會元崇志率所部馬隊循左路平川斜襲打拉城之後副將黃虎臣率所部馬隊循中路徑搗打拉城黃鼎自率副將李玉春副將何玉超等步隊繼之比抵打拉城見兩山開豁地勢寬平當飭馬步聯絡徐行賊見官軍馬步各隊誤爲鹽茶廳西安堡前來會合之賊適然不驚官軍亦不動聲色迫逼近賊前號鼓齊鳴聲震山谷賊出不意狂號亂竄黃鼎揮軍橫衝直突立將賊衆截爲三段一奔向打拉城一奔向東北山一向北面亂山狂竄李玉春何玉超各率親兵及洋礮



隊分路截殺斃賊數百墜崖跌斃者不可勝計於時呼  
敦石營馬隊逼近打拉城逆眾憑街口抗拒弁丁下馬  
開鎗轟擊刀矛手猿騰而上立將堡城攻破逆眷騾  
糧料輜重塞滿街衢黃虎臣帶隊從人畜堆中衝出街  
口逆回馬步數千拚命返鬪黃虎臣督勇下馬步戰李  
玉春何玉超等所部步隊適至結成方營橫貫賊陣張  
會元崇志所部馬隊適從左路平川抄出賊後前後夾  
攻斃賊無算騎賊先奔步賊則圍殺殆盡矣馬隊各營  
仍向西追殺其右路馬步各營進攻東北山梁之賊甫

上第一重山梁賊之馬步已嘯聚一處由上壓下力抗  
官軍胡應芳督馬隊繞上山梁之左林定遠督步隊繞  
上山梁之右後兩營步隊又從中路整隊齊進立斃悍  
賊數十名賊眾紛潰各營三面併進搶上山梁齊壓而  
下追殺十餘里斃賊約四五百名收隊回打拉城行十  
餘里忽山口突有紅旗馬賊數百飛駛而來林定遠黃  
有忠朱蘭亭督隊截殺花翎守備賈洪順衝入賊中礮  
子穿胸陣亡胡應芳怒馬陷陣步隊繼之立斃悍賊百  
數十名奪獲賊馬數十匹賊賊飛奔上山而逸比各營

收隊回打拉城則夜半矣是役計共斃賊二千七八百  
墮崖死者不計獲駱駝一千二百餘頭騾馬牛驢共二  
千餘頭獲賊糧器械無數生擒二百餘名擄其兇悍者  
百餘名軍前正法餘仍釋之此九月十六十八兩日黃  
鼎馬德順馬步各營獲勝情形也臣維馬德順黃鼎馬  
步兩軍十六日擊敗之賊是由頂望等堡竄出之陝回  
白彥虎禹得彥李經舉等股十八日所擊之賊是由甯  
安堡四百戶等處竄出之馬生彥陳林顏阿洪擲萬海  
治阿洪及馬正和餘黨是陝回悉數西竄甯夏靈州已

無陝回踪跡矣賊之西竄意在會合河州逆回此次雷  
正綰周蘭亭簡敬臨黃鼎諸軍擊之固原黑城于李旺  
堡連獲大捷甘回不敢容留陝回以干剿辦預望城生  
簡城章州堡各甘回均已欵營求撫臣已飭總理營務  
道員曾傳理察其誠僞分別辦理其陝回之竄至西安  
堡打拉城者又經馬德順一擊之西安堡以西黃鼎擊  
之打拉池以北計其殺悍賊數千賊之糧食輜重軍械  
牲畜實已拋棄過半似甘肅北路肅清可期臣現檄雷  
正綰由半箇城進長流水新堡子周蘭亭簡敬臨繼之

期與黃鼎馬步諸軍夾擊之效其先原一殿黃鼎所部陞用提督徐占彪步隊三營已於十七日由靜甯州赴會甯截剿臣所調提督楊世俊正四旗馬隊亦於二十二日馳抵靜甯州二十三日馳往會甯合隊賊如由會甯出安定黃鼎一軍及張會元崇志馬隊當先顧蘭州肖會然後追剿向河州之賊諸軍西趨其固原黑城子李旺堡一帶新復之區不可無軍填紮現檄記名總兵張福齊率所部五營分駐黑城子李旺堡記名提督周紹濂率所部四營分駐瓦亭固原州以重北路之防

而通諸軍之氣臣拜摺後料理後路糧運事宜卽進軍  
平涼布置一切將來或由中路或由南路前進或緩或  
急屆時惟當審度機宜慎以圖之所有此次連獲大捷  
在事將士戰功卓著合無仰懇

夫恩加以甄叙提督銜前衛州鎮總兵鏗僧額巴圖魯  
簡敬臨請

賞給頭品頂戴題奏提督利勇巴圖魯周蘭亭請

賞換清字勇號提督銜記名總兵果勇巴圖魯姚連陞  
請以提督陞用提督銜記名總名豪勇巴圖魯劉明泰

請

賞給三代正一品封典閩浙補用總兵趙成學請

賞給勇號記名總兵譚正明請

賞加提督銜陞用總兵彭壽山請以總兵補用留陝補用副將崇志請

賞加勇號副將銜甘肅補用參將桂錫楨請以副將仍留甘肅補用儘先補用參將劉曉嵐請以副將補用湖南補用參將楊光龍請以副將仍留原省補用副將銜儘先參將李廣珠請以副將儘先補用遊擊銜湖南進

補都司簡宗儀請免補遊擊以參將儘先補用候選縣丞吳恩聚請免選本班以知縣留於甘肅儘先補用並賞加五品陞銜陝西提督達春巴圖魯雷正綰二品頂戴按察使銜陝西陝安道呼敦巴圖魯黃鼎應否

頒賞物件各營馬步員弁兵勇可否擇其尤爲出力者彙彙保獎均出自

天恩不勝感激待

命之至所有官軍會剿北路逆回連獲大捷情形謹會同署陝甘總督臣穆圖善幫辦軍務署陝西巡撫臣劉



典合詞馳陳伏乞

皇太后

皇上聖鑒訓示施行謹

奏 同治八年九月三十日

同治八年十月初七日內閣奉

上諭左宗棠奏官軍會剿北路回匪連獲勝仗請將出力各員獎勵一摺陝甘回股由預望城黑城子竄入固原州經提督雷正綰等分路迎擊立破黑城子回堡擒斬多名甘回馬萬春賊陝回偽帥楊文治等旁山胡家

原坡大股屯踞固原之三營地方分撲官軍營盤雷正  
結等設伏迎剿鎗礮環施斃賊無數黑城子踞逆楊文  
治率賊騎數百飛馬突陣官軍分隊迎截立將楊文治  
殲斃先後殺斃悍賊千餘名生擒百數十名雷正結等  
率隊進攻李旺堡穆家澗等處賊巢即時攻破擒斬偽  
副元帥楊輝雲一名其由預望甯安等堡竄出各股亦  
經道員黃鼎等奮勇截擊殺斃二千餘名陝回悉數西  
竄甯夏靈州已無陝回蹤跡剿辦甚爲得手卽著左宗  
棠嚴飭各軍乘勝進攻盡殲醜類此次尤爲出力之總

兵簡敬臨著賞給頭品頂戴提督周蘭亭著賞換捕奇  
巴圖魯名號總兵姚連陞著以提督陞用劉明泰著賞  
給三代正一品封典趙玉亭著賞給克勇巴圖魯名號  
譚正明著賞加提督銜彭壽山著以總兵補用副將崇  
志著賞給達春巴圖魯名號參將桂錫楨著以副將仍  
留甘肅補用劉曉嵐著以副將儘先補用楊光龍著以  
副將仍留湖南補用李廣珠著以副將儘先補用都司  
簡宗儀著免補遊擊以參將儘先補用縣丞吳恩榮著  
免選本班以知縣留於甘肅儘先補用並賞加五品陞

銜提督雷正綰著賞給大荷包一對小荷包兩個白玉搬指一箇白玉翎管一支火鑷一把道員黃鼎著賞給大荷包一對小荷包兩箇白玉搬指一箇白玉翎管一支火鑷一把以示鼓勵其餘出力員弁著准其擇尤保獎毋稍冒濫該部知道欽此

軍機大臣

字寄同治八年十月初七日奉

上諭左宗棠奏北路官軍剿獮疊勝請將出力各員獎叙一摺陝回白彥虎甘回李正榮各股由預望城等處竄入固原經雷正綰各軍分路擊敗馬化隆又遣馬萬

春等進擾南路官軍在黑城子一帶追剿獲勝將逆首楊文治殲斃其李旺等賊巢亦即攻破並生擒賊帥楊輝雲陝回禹得彥等約衆西趨道員黃鼎等軍追至打拉池一帶將賊痛擊甯靈現無陝回踪跡本日已明降諭旨賞給雷正綰等物件並將總兵簡敬臨等分別獎叙矣此次陝回糾衆分擾意圖阻截官軍白彥虎等雖負剝西窺難保不勾煽河州各回復行東犯左宗棠現檄雷正綰等軍分投防剿並擬進軍平涼著卽嚴飭雷正綰等各率所部相機夾擊將未獲之各回目擒斬淨

盡以靖陝氛並著將後路糧運事宜趕緊布置於抵平涼後斟酌緩急整軍前進一面將蘭州省垣及河州狄道防剿各務悉心籌畫並飭張會元崇志等力顧蘭州不可稍涉疎虞馬化澁是否顯露叛跡抑係求撫緩師靈州一城如果失陷究爲何般所襲均著該大臣遵奉前旨將該城有無被陷及劉松山濫殺激變各情迅速查明具奏其預望城半箇城各處甘回旣經欵營求撫卽著飭令會傳理妥速辦理但不可爲其所紿致貽後患將此由六百里諭令知之欽此

馬德順陣亡請卹片

再統領奇營馬隊記名提督浙江處州鎮總兵博啟巴圖魯馬德順自咸豐十年會國藩派帶馬勇二百名隨臣征剿安徽江西浙江各省髮逆由守備銜千總積功擢總兵蒙

恩簡放處州鎮總兵同治六年臣調任陝甘總督時馬德順卽請赴陝甘隨同征剿嗣因會國藩調隨李鴻章剿捻未果上年臣在直隸剿捻事畢西旋始奏調入秦該員其事十年轉戰五省勞烈爲臣所素知其人品行

端嚴言動不苟治軍最尚紀律於馬戰聚散分合及飼  
養章程講求有素尤一時將領中所僅見此次遵調會  
剿道過涇州與臣晤談慨然以肅清西北自任十六日  
之戰於蜂屯蟻聚之中奮厲無前領隊衝殺五十餘里  
將西安堡一帶賊巢數十處概予踏毀各營請少憩以  
待步隊之至馬德順以賊雖大敗而首逆未擒須及前  
途狹隘逆賊團聚處猛躡之冀可多殺當飭各營分途  
衝擊自率十餘騎策馬先行察看地勢以便調度行至  
劉家井瞥見羣賊數十擁一賊迅馳而前馬德順拍馬



飛追鎗中賊首落馬旋爲兩面伏賊環繞羣矛刺傷猶  
與副將張顯揚格殺數賊始殞當黃鼎張會元飛報馬  
德順陣亡將半箇城良回丁化鵬等亦馳告黑城子各  
營稱逆首白彥虎業經馬隊殲斃臣未敢信茲復據道  
員會傅理及周蘭亭等緘報各降回僉稱白彥虎腰中  
子傷立斃屬實而黃鼎十八日報捷之稟則未叙及臣  
亦不敢冒昧具奏竊維馬德順血戰捐軀卽無陣斃首  
逆之事忠義大節亦足上邀

褒卹况既有所聞因亦未可任其掩抑不彰仰懇

天恩飭部將記名提督浙江處州鎮總兵博啟巴圖魯  
馬德順照提督陣亡例給

卹典並懇

賜諡

恩准建祠河南洛陽原籍及甘肅西安堡地方以彰戰  
績而安忠魂其同時遇害之副將張顯揚花翎都司張  
成進董萬青擬保都司熊天起把總楊大鵬沈鳴山徐  
壽喜李大榮外委姚光成均應請

旨飭部各照官階從優議卹並附祀馬德順專祠以彰

忠義其十八日之捷黃鼎所部花翎守備擬保都司賈洪順力戰陣亡應請

旨飭部一併照擬保都司議卹謹附片陳明伏乞

聖鑒訓示施行謹

奏 同治八年九月二十日

同治八年十月初七日內閣奉

上諭左宗棠奏請將陣亡總兵馬德順等分別予卹建祠等語記名提督浙江處州鎮總兵馬德順前在安嶽江西浙江直隸等省疊次帶勇剿賊著有戰功七年經

左宗棠調赴陝西本年九月在甘肅西安堡一帶地方剿匪踏毀賊營數十處殺賊甚夥該員以首逆未擒深追遇伏力戰陣亡殊堪嘉憫馬德順著照提督陣亡例議卹並加恩予諡在河南洛陽原籍及甘肅西安堡各建專祠同時遇害之副將張顯揚都司張成進董萬青擬保都司熊天起把總楊大鵬沈鳴山徐壽喜李大榮外委姚光成均著各照官階從優議卹並附祀馬德順專祠其黃鼎所部陣亡守備擬保都司賈洪順並著照擬保都司議卹以彰忠烈該部知道欽此

請俟捐務辦有成效分別獎叙片

再臣准西征糧臺翰林學士袁保恆咨稱各省設立甘捐分局全在局員實心經理方足以廣招徠而收實效請明定賞罰以示勸懲等因前來臣維甘餉奇絀不得已而藉助捐輸復詳設分局以資協濟若各局員等不能實力勸辦於軍需仍屬無補該學士請明定賞罰自係爲整頓捐務起見臣擬嗣後各省分局收捐米折至十萬石以上者卽予

奏請獎叙一次如辦理不善虛糜經費卽由袁保恆會

同各省督辦大員隨時分別撤委記過庶局員皆知奮  
勉於捐務實裨益是否有當謹附片具陳伏乞

聖鑒訓示施行謹

奏 同治八年八月三十日

軍機大臣奉

旨戶部議奏欽此